

Govor visokog predstavnika Valentina Inzka u povodu 16. obljetnice helikopterske nesreće na Prokoškom jezeru



Plan za Bosnu i Hercegovinu

Prošlo je šesnaest godina od kada je dvanaest naših kolega poginulo na ovoj planini. Kako vrijeme prolazi, raste razdaljina – razdaljina između Bosne i Hercegovine kakvu su oni znali i zemlje koja danas postoji.

Razlike su značajne. Naše kolege su radile na pitanjima u svezi sa slobodom kretanja i pružanjem osnovnih usluga, kao i drugim aspektima svakodnevnog opstanka s kojima su se građani BiH suočavali u periodu neposredno nakon rata.

Unatoč svim nazadovanjima i razočarenjima, Bosna i Hercegovina se danas suočava s izazovima koji su poznati i drugdje u Europi – kako otvoriti nova radna mjesta, popraviti stanje u školama, pružiti bolju zdravstvenu zaštitu.

No, iako je bez sumnje napravljen značajan napredak, vizija Bosne i Hercegovine kao prosperitetne i inkluzivne demokracije u srcu Europe još uvijek nije provedena u djelo. To je bila i vizija kolega kojih se danas ovdje sjećamo. To je vizija međunarodnih partnera Bosne i Hercegovine i vjerujem da je vizija većine od četiri milijuna građana ove zemlje.

Vjerujem da je napredak izostao i stoga što mnogi lideri u

Bosni i Hercegovini nisu u potpunosti razumjeli ovu viziju. Oni je nisu odbacili: jednostavno je nisu ispravno razumjeli. Njihov način razmišljanja je ostao u prošlosti, dok je ostatak zemlje i kontinenta krenuo dalje u 21. stoljeće.

Dok su neki od lidera fokusirani na provođenje prevaziđenih politika koje su donijele samo bol narodu ove zemlje, građani Bosne i Hercegovine su spremni prihvatiti suvremenu politiku koja donosi sigurnost, prosperitet i europsku integraciju.

Danas odajemo počast Peteru Backesu, Liviju Beccacciou, Andrzej Buleru, Davidu Kriskovichu, Leahy Melnick, Charlesu Morpethu, Williamu Nesbittu, Marvinu Padgett, Thomasu Reinhardt, Jurgenu Schaufu, Georgu Stiebleru i Gerdu Wagneru.

Vjerujem da ćemo im istinski odati počast – svakog dana i s najviše smisla – ako budemo promovirali njihovu viziju prosperitetne i inkluzivne demokracije u srcu Europe.

Kada politički lideri ove zemlje budu razumjeli ovu viziju, Bosna i Hercegovina će krenuti naprijed. Pozivam sve da obnovimo naše opredjeljenje za tu viziju.